

LA QUOTIDIANA

FMR Fundaziun Medias Rumantschas, Via da Masans 2, 7000 Cuirà, 081 544 89 11, redacziun@fmr.ch



Franz Hohler, il rumantsch e la «malur»
Lenconuschent autur e cabarettist svizzer ha era scrit texts rumantschs – u translata da quels. **Pagina 2**



In mund abstract tranter fotografia e pictura
Il fotograf da Sched Mathias Kunfermann expونا ina part da sias ovras en il Kino Rätia a Tusaun. **Pagina 6**

FMR FUNDAZIUN
 MEDIAS
 RUMANTSCHAS
südostschweiz

SURSELVA

Aunc diesch surprisas da No Future

Gl'onn 2001 ha ina grappa d'adherents da musica dira fundau a Glion ina nova band. Quella ha retschert il num «No Future». Aunc adina, 21 onns pli tard, exista ella denton. In dils confundatur, *Samy Schmid*, suna aunc adina e conta cun No Future. El ei gl'autur dils texts dils treis albums e dalla single. Actualmein presenta la band il quart album. Quel cuntegn 12 songs ed ha il tetel «XII». La cefra romana fa senn, pertgei il niev disc cumpact vegn battegius gl'avrel 2023, cu la formaziun presenta il dudischavel toc. Ils 20 da matg ha ella presentau gl'emprem ed ils 17 da zercladur il secund. Mintga meins dat ei aschia ina surprisa pils fans da musica da funk e rock. (fmr/abc) **Pagina 4**

SURSELVA

Anavos el temps dils castials



Il casti zuppau sur il Rein anteriur. FOTO MAD

L'Associaziun dils museums dil Grischun ha lantschau il project «Museums e turissem da cultura». La finimira da quel ei d'enrihir la purschida dallas destinaziuns da vacanzas pils turists, mo era pils indigens. Il project che vegn sustenius da pliras varts ei vegnius scaffius en cooperaziun cul sectur da perscrutaziun davart il turissem ed il svilup persistent dalla Scol'aula per scienzias applicadas Turitg. Ad el separicipescha era il museum dil «Meister da Vuorz». Il focus da sia purschida, respectiv d'in giug, ei il Casti Grotta. El ei vegnius baghegius all'entschatta dil 14avel tschentaner e paradescha sur il Rein anteriur. Damai ch'ei dat a Vuorz era il casti dil Munt sogn Gieri, ei quel cheu strusch aschi enconuscents. (fmr/hh) **Pagina 5**

GRISCHUN CENTRAL

Investiziuns da ples 10 milliuns francs

La vischnanca da Vaz è cun 35% dallas aczias igl pi grond acziunari dallas Penderas Lai SA. Tar la preschentaziun dalla strategia è igl president digl cunsegl d'administraziun dallas penderas, *Felix Frei* tradia, tg'ins vigna ad investeir puspe igls proxims onns. Investiziun vignan fatgas tar la digitalisaziun, tigls neivadoirs ed igls lais d'accumulaziun e las sotpergas Täli, Tgantien e Scalottas. Pinavant duessan igls projects hotel e tgesa da parcar Fadail e Canols neir persequitos anavant. I seia er da dar anc duple peisa agls puncts strategics tgi pertotgan igl ski alpin per famiglias, la purscheida gastronomica e promover anc pi fitg igl sport da bike, è detg Felix Frei. (fmr/gns/sab) **Pagina 9**

Nuorsas en panica semazzan

Ch'ei ha lufs ella Val Cristallina han ins fatg stem gia l'entschatta dalla stad. La notg dalla sonda silla dumengia ein treis turnai el liug nua ch'in dad els ha scarpau la sonda vargada sur miezgi in tschut e nua che ver 40 nuorsas ein idas alla malura ella panica.

ANDREAS CADONAU/FMR

La pastira a Palius ella Val Cristallina ei ualti carpusa e surcarschida cun cagliom. In liug ideal per in luf per s'avischinar ad ina muntanera malgrad che las 1600 nuorsas ein accumuladas da sis tgauns da protecziun. La sonda ein 35 nuorsas en panica sesturnidas egl in-tschess carpus ed ulteriuras nuorsas blessadas han ins stuiu mazzar. Per *Arno Puorger* digl Uffeci da catscha e pesca eis ei fetg probabel che

«In ni plirs lufs han attaccau la muntanera da bi clar gi.»

Christian Unterholzer, pur e cautegia

las nuorsas ein vegnidas en panica pervia dad in ni plirs lufs. Al pur e cautegia *Christian Unterholzer* saudan las biaras dallas ver 40 nuorsas sesturnidas e mazzadas. El ha confirmau che las nuorsas seigien mintgamai duront la notg en in claus. El ed il pastur han anflau las nuorsas crapadas e blessadas sternidas pil cagliom entuorn la sonda vargada. Per il possessur dallas nuorsas dat ei pauc da dubitar: «In ni plirs lufs han attaccau la muntanera da bi clar gi e caschunau ina mazzacrada.» **Pagina 5**

«Nus n'avain però betg laschè pender il chau ed avain mussà grond engaschi fin la fin dal giu.»

A l'Europeada han las equipas da ballape rumantschas demussà ina buna morala – malgrà sconfittas e blessuras. – Pagina 2



FOTO ANDRI NETZER

Las rotschas sun darcheu gnüdas

Normalmaing es Zernez ün cumün quiet e pachific. Normalmaing – adüna vers la fin da giun as transuorma'l in ün «mecca» da la musica electronica – per esser precis dal Goa- e dal Psytrance – e rotschas d'amaturas e d'amatur da quel gener da musica pelegreschan tras il cumün in direcziun Praschitsch. Sül prà, situà a l'entrada dal cumün ed in üna storta da l'En, ha lö il «Burning Mountain Festival». Davo duos ons posa sforzada ha'l attrat ingon darcheu raduond 5000 persunas. (fmr/an) **Pagina 11**



20026
 Servetsch d'abunents e da
 distribuziun: tel. 0844 226 226
 mail: abo@somedia.ch

9 771424 749004